

**Հայտարարություն Երևանի Քաղաքապետարանի կողմից
լրատվամիջոցներին անհատույց կամ վարձակալության հիմունքներով
տրամադրված տարածքներն ազատելու մասին ստացած ծանուցման
վերաբերյալ**

27 փետրվար, 2019 թ., Երևան

Փետրվար ամսին և հատկապես վերջին շաբաթվա ընթացքում բազմաթիվ
լրատվամիջոցներ Երևանի քաղաքապետարանից ծանուցում են ստացել անհատույց
կամ վարձակալության հիմունքներով իրենց տրամադրված տարածքներն ազատելու
մասին: Ընդ որում, որպես կանոն, դրա համար տրվել է 5 օր: Այսպիսի հապճեպ և
կտրուկ քայլերի անհրաժեշտությունը չի կարող արդարացվել այն հիմնավորմամբ, թե
համայնքի սեփականությունը հանդիսացող տարածքները պետք է օգտագործվեն
առավել արդյունավետ:

Մենք՝ ներքոստորագրյալ կազմակերպություններս, ի գիտություն ենք ընդունում
քաղաքապետարանի հավելյալ պարզաբանումը, որ ծանուցումը մեխանիկորեն չի
հանգեցնում օգտագործման իրավունքի դադարեցման և որ 5 օրը վերջնաժամկետ չէ
ու չի ենթադրում, որ կազմակերպությունները պետք է ազատեն տարածքը, ինչպես
նաև հավաստիացումը, որ յուրաքանչյուր դեպքով կկայացվի առանձին որոշում:

Այդուհանդերձ, քանի որ այս անհեռատես որոշումն ու դրանից բխող քայլերը
սպառնում են լրատվամիջոցների բնականոն գործունեությանը, պահանջում ենք.

- ՀՀ կառավարությունից՝ անդրադառնալ ՁԼՄ-ներին տարածքներ տրամադրելու
խնդրին և համակողմանի ու լայն քննարկումների միջոցով գտնել հավասարակշռված
լուծումներ,
- Երևանի քաղաքապետարանից՝ դադարեցնել սկսած գործողությունները և չեղարկել
ՁԼՄ-ներին ներկայացված պահանջները, նախաձեռնել քննարկումներ և
բանակցություններ լրատվամիջոցների ղեկավարների հետ՝ առաջարկելով
մոտեցումներ՝ հետագայում հարցի համակողմանի լուծման համար:

Կոչ ենք անում լրատվամիջոցների ղեկավարներին՝ չդրամատիզացնել իրավիճակը և
հաշվի առնելով պաշտոնական պարզաբանումները՝ բանակցել քաղաքապետարանի
հետ՝ ներկայացնելով սեփական առաջարկություններն ու պահանջները: Պատրաստ
ենք օգտակար լինել այդ գործընթացին՝ ներկայացնելով մեր տեսակետներն ու
լուծումները:

ԽՈՍՔԻ ԱԶԱՏՈՒԹՅԱՆ ՊԱՇՏՊԱՆՈՒԹՅԱՆ ԿՈՄԻՏԵ

ԵՐԵՎԱՆԻ ՄԱՄՈՒԼԻ ԱԿՈՒՄԲ
ՄԵԴԻԱ ՆԱԽԱԶԵՌՆՈՒԹՅՈՒՆՆԵՐԻ ԿԵՆՏՐՈՆ
ԼՐԱԳՐՈՂՆԵՐԻ «ԱՍՊԱՐԵԶ» ԱԿՈՒՄԲ
ԻՆՖՈՐՄԱՅԻԱՅԻ ԱԶԱՏՈՒԹՅԱՆ ԿԵՆՏՐՈՆ
ՀԱՆՐԱՅԻՆ ԼՐԱԳՐՈՒԹՅԱՆ ԱԿՈՒՄԲ
«ԼՐԱԳՐՈՂՆԵՐ ՀԱՆՈՒՆ ԱՊԱԳԱՅԻ» ՀԿ
«ԼՐԱԳՐՈՂՆԵՐ ՀԱՆՈՒՆ ՄԱՐԴՈՒ ԻՐԱՎՈՒՆՔՆԵՐԻ» ՀԿ